

Siunnersuummut nassuiaatit**Nalinginnaasumik nassuiaatit**

Inatsisartut suleriaasertik kingullermik 2010-mi novembarip naalernerani allanngortippaat. Allanngortitsinerup siunertaraa suleriaatsimik ataatsimut isigalugu paasiuminarsaanissaq 1999-imi suleriaatsip akuersissutigineqarnerata kingorna allannguuterpassuusimasut ataatsimut allanneqarnerisigut, taamatullu aamma suleriaatsip Inatsisartut Naalackersuisullu pillugit inatsimmut nutaamut naapertuuttuunissaata qularnaarneqarnissaa. Taamatutaaq suleriaatsimi ilaatigut aalajangersarneqarpoq inatsisissatut aalajangiiffigisassatullu siunnersuutit aningaasatigut allaffissornikkullu kingunerisassaasa allaaserineqarnerinik ilaqartinneqartassasut, soorlu aamma Inatsisartut oqaluuserisassaata pillugit aalajangiiniartarneq eqqarsaatigalugu oqartusnaanernik Inatsisartunit siulittaasoqarfimmut nuussisoqartoq, Naalackersuisunullu oqaasiinnakkut apeqquteqarsinnaanermut periarfissat killilerneqartut.

Tamatuma saniatigut piffissat oqaaseqarfiusinnaasut nutarteqqinneqarput Inatsisartuni oqalliseriaatsip ineriartortinneqarnerata ingerlatiinnarneqarnissaanik kissaateqarneq aallaavigalugu, tamatumalu malitsigisaanik inatsisissatut siunnersuutit, aalajangiiffigisassatut siunnersuutit, nassuiaatit ammaanersiorlunilu oqallinnermi partiit oqaaseqartuisa saqqummiussaqaarnerannut inaarutaasumillu oqaaseqaateqarnernut atatillugu amerlanerusunik apeqquteqarnissamut akissuteqarnissamullu periarfissiisoqarluni.

Inatsisartut suleriaasiata nutarterneqarneranik suliaqarnermut peqatigitillugu Inatsisartuni ataatsimiititaliaqarnikkut aaqqissuusaaernerup allanngortinneqarnissaaneranut periarfissat Siulittaasoqarfiup 2010 oqallisigisarpai. Oqallinnerit taakku maanna ineraat ataatsimiititaliat arlallit kattunneqarnissaannik Siulittaasoqarfik siunnersuuteqarmat, taamaalillunilu Inatsisartuni ataatsimiititaliat tamarmiusut malunnartumik ikilisinneqassallutik.

Taamaaliornikkut siunertarineqarpoq ilaatigut ataatsimiititaliat ataatsimiittarnerinut angalasarnerinullu il.il. periarfissat pitsaanerulersinneqarnissaat, taamatullu aamma inatsisissatut aalajangiiffigisassatullu siunnersuutinik, ullumikkut ataatsimiititaliat arlallit suliassaqaarfiinut tunngasinnaasunik, ataatsimiititaliani sularinnittarnerup nukittorsarneqarnissaa. Taamatut ataatsimiititaliat suliassaqaarfiisa annertusineqarneratigut ataatsimiititalianut ilaasortat ataasiakkaat misilittakkanik katersinerisigut, taamatutaaq ataatsimiititalianik kattussineq toqqaannanngikkaluartumik aamma inatsisartuni naalackersuinikkut oqaaseqartartuuffeqarnernik nukittorsaanissamut tunngavissiiisinaavoq, taamattoqarneratigullu Inatsisartuni naalackersuinikkut sulineq aamma nukittorsarneqassalluni.

Siunnersuutigineqartut ataatsimiititaliaqarnikkut aqqissuussaaneermik allanngortitsinikkut ataatsimiititaliat ataasiakkaat susassaqarfii annertusineqarpata, ataatsimiititaliami ilaasortat suliassaat taamaqataanik aamma annertusineqassapput.

Ataatsimiititalianilli kattussuinissamik Siulittaasoqarfiup siunnersuutaatigut taamaattoq aamma Inatsisartuni ataatsimiititaliani ilaasortaaffiit tamarmiusut peqatigitillugu ikilisinneqartussaapput. Taamaattumik ataatsimiititaliaqarnikkut aqqissuussaaneermik allanngortitsineq Inatsisartunut ilaasortanut ataasiakkaanut nalinginnaasumik imatut kinguneqassasoq naatsorsuutigineqarsinnaavoq, taakku ataatsimiititaliani ikinnerusuni ilaasortaaffeqalerlutik, akerlianilli ataatsimiititaliani suliassaqarfiunerusuni ilaasortaaffeqalerlutik.

Tamatuma malitsigisinnaasaanik kingupiluusinnaasut pinngitsoortinniarlugit ataatsimiititalianilu attorneqartussani suliqaarnerulersinnaaneq minnerpaatinniarlugu pissusissamisoornerpaatut isigineqarpoq ataatsimiititaliani inissat silinnerusumik agguataarneqarsinnaanerit qularnaarniarneqarpat. Taamaattumik siunnersuummi anguniarneqarpoq periarfissiisoqassasoq ataatsimiititaliat pineqartut siunissami tallimanik ilaasortaqaqatik taarsiullugu arfineq-marlunnik ilaasortaqaarsinnaanerit tunngavissinneqassasoq.

Inatsisartunut aningaasatigut kingunerisassai

Inatsisartuni ataatsimiititalianut maannamut aningaasartuutaasarsimasut tassaanerupput ataatsimiititaliat angalanerinit aningaasartuutit, tassalu bilitsinut akunnittarfimmiinnernullu aningaasartuutit kiisalu ullormusiaq. Ataatsimiititaliat aqqaneq-marluk ataatsimiititaliat kattunneqarnissaannik siunnersuummit attorneqartussat ullumikkut immikkut tamarmik ataatsimiititaliat angalanerinit kr. 300.000-inik atugassaqartinneqarput, katillugit kr. 3.600.000-inik. Ataatsimiititaliali pineqartut aqqaneq-marluk maannamut atuinerat taakkuninnga malunnartumik annikinnerusarsimasoq.

Ataatsimiititaliami ilaasortat tallimaniit arfineq-marlunnut amerlineqarpata Siulittaasoqarfiup isumaliutigisariaqassavaa tamatuma malitsigisaanik ataatsimiititaliat pineqartut angalasarnerinit aningaasaliissutit amerlineqarnissaat pisariaqartinneqassanersoq.

Peqatigitillugu ataatsimiititalianik kattussuineq ataatsimiititaliat ilaasa suliassaqarfiinik annertuumik annertusisitsisussaavoq, tamannalu malitseqarsinnaalluni angalasarnerit annertusineqarnissaasa pisariaqartinneqalerneranik assersuutigalugu ataatsimeersuarnernut isumasioqatigiinnernullu il.il. peqataanernut. Pissutsit tamakku aamma ataatsimiititaliat ataasiakkaat angalanernut atorsinnaasaasa iluarsineqarsinnaanerit pillugu isumaliutinik pilersitsisinnaapput.

Ataatsimulli isigalugu ataatsimiititalianik ikilisitsineq Nunatta Karsiata aningaasartuutaanik annikillisarniarneqarnerannut ajunngitsumik sunniuteqarnissaa naatsorsuutigineqarpoq.

Allaffissornikkut kingunerisassai

Siunnersuut toqqaannartumik allaffissornikkut kinguneqassanngilaq. Siunnersuutikkut naatsorsuutigineqarpoq ataatsimiititaliat ataatsimiittarnerisa eqqaannerusumik ingerlanneqartalernissaat, angalanerusalernerannilli illuatungilerneqartumik.

Allatigut kingunerisassai

Allanguutissatut siunnersuut allatigut kinguneqassanngilaq.

Tusarniaaneq

2010-mi suleriaatsimi allanguutit 2010-mi naalackersuinikkut suliniaqatigiiffinnut tusarniaanerni marlunni saqqummiunneqarput. Tamatuma ilaatut naalackersuinikkut suliniaqatigiiffiit ataatsimiititaliaqarnikkut aaqqissuussaaneq taamatullu aamma siulittaasoqarfiup ataatsimiititaliallu tamarmik piffissaq qinigaaffigisartagaat ilanngullugit isummorsorfigaat. Naalackersuinikkut suliniaqatigiiffiit pinngitsortaqaratik siulittaasoqarfiup ataatsimiititaliallut ukiut tamaasa pilersinneqartarnissaat orniginartinneruaat.

Aalajangersakkanut ataasiakkaanut nassuiaatit

§ 1, nr. 1-imut

Suleriaatsimi § 9, imm. 1, oqaaseqatigiit siulliit siunnersuutigineqartutut oqaasertalerneqarnerata malitsigissavaa ataatsimiititaliat tamarmik malittarisassatut pingaarnertut maannamullu malittarisassat naapertorlugit tallimanik ilaasortaqaartassasut.

Taamatuttaaq inatsisiliortut atuutsitsisullu avissartismanissaannik pissaanerup agguataarneqarsimaneranut inatsisitigut tunngavissat naapertorlugit suli piumasaqaataavoq Naalackersuisunut ilaasortat tamatumunnga peqatigitillugu Inatsisartut ataatsimiititaliaannut ilaasortaasinnaassanngitsut.

Imm. 1-imi oqaaseqatigiit aappaanni nutaamik oqaasertaliinikkut siunnersuutigineqarpoq Siulittaasoqarfik Inatsisartunut inassuteqarsinnaatitaalissasoq siunnersuutigalugu ataatsimiititaliaq tallimanik ilaasortaqaarani arfineq-marlunnik ilaasortaqaassasoq. Taamaalilluni naatsorsuutigineqarpoq ataatsimiititaliaq Inatsisartut akuersereerneratigut arfineq-marlunnik ilaasortaqaartoq, §§ 7 aamma 8 naapertorlugit kingusinnerusukkut pilersinneqassaguni

Siulittaasoqarfiup nutaamik inassuteqarneratigut tallimanik ilaasortaqaarsinnaasoq.

Ataatsimiititalianut ilaasortassanik arfineq-marlunnik aatsaat qinersisoqaarsinnaavoq immikkut pissutsit tamanna pisariaqartippassuk. Taamaaliornikkut taamaalilluni tamatuma pingaartumik maanna Inatsisartut ataatsimiititaliaasa aqqaneq-marlunniit tallimanut kattunneqarnerannut atatillugu atorneqartussatut naatsorsuutigineqarpoq, taamaallaallu ataatsimiititaliat suliassaqaarfiinik malunnartumik annertusisitsiviusut kisiisa eqqarsaatigalugit.

Immikkut pissutsit aamma atuussinnaapput assersutigalugu ataatsimiititaliaq qulaajaanissamik aalajangersimasumik annertuumillu inatsisartut ukiuini arlalinni ingerlasussamik suliakkerneqarsimapput.

Tamatuma saniatigut Siulittaasoqarfiup nammineq aalajangertarlugulu inassutigisassavaa immikkut pissutsit qaqugukkut atuunnersut.

§ 2-mut

Ingerlaannaq atuutilersitsinissamik siunnersuutip malitsigisavaa ataatsimiititaliat pineqartut siunnersuutip akuersissutigineqarnerata kinguinngua sulilerlutillu inissitersinnaanissaat.

Suleriaatsikkut nutaakkut 12. november 2010-meersukkut Aningaasaqarnermut Kukkuersiuiinermullu Ataatsimiititaliat upernaakkut ataatsimiinnerni qinerneqartalernissaat tunngavissinneqarpoq ukiumut tullermut aningaasanut inatsisissap akuersissutigineqannginnerani taamatullu aamma ukiup siulianut naatsorsuutit akuersissutigineqannginneranni, tamarmik ukiakkut ataatsimiinnermi pisartut, ataatsimiititaliami ilaasortat nutaat ataatsimiititaliap suliassaqaarfiini misilittagaqalernissaat siunertaralugu.

Ataatsimiititaliaqarnikkut aqqissuussaaneq nutaaq, ilaatigut ilaasortat ataasiakkaat ataatsimut isigalugu suliassaqaartitaanerat isiginiarlugu partiini ataasiakkaani ataatsimiititaliani inuttaqartitsinerup isumaliutigeqqinneqarnissaanik pisariaqartitsisinnaammat, suleriaatsip allannguutaataa atuutilernerata kinguinngua Inatsisartuni ataatsimiititaliat tamarmik nutaamik inuttalernerneqarnissaat siunnersuutigineqarpoq.

Tamatuma malitsigisavaa Aningaasaqarnermut Ataatsimiititaliamut aamma Kukkuersiuiinermut Ataatsimiititaliamut ukiakkut ataatsimiinnermi matumani immikkut ittumik qinersisoqarnissaa, Inatsisartuni ataatsimiititalianut allanut qinersinernut peqatigitillugu.

Taamatut oqaasertaliinikkut suleriaasissami § 7, imm. 2 naapertorlugu Aningaasaqarnermut

Kukkunersiuinermullu Ataatsimiititaliat piffissaq qinigaaffiat atuuttoq 2012-imi upernaakkut ataatsimiinnermiit malinneqalissaaq.